



Pou Piblikasyon Imedya: 08/12/2023

GOUVÈNÈ KATHY HOCHUL

## **GOUVÈNÈ HOCHUL EGZÒTE MOUN NEW YORK POU YO PREPARE POU GWO LAPLI, RAFAL VAN AK NÈJ NAN DIMANCH AK LENDI**

*Total lapli soti nan 1-3 pouz atravè eta a ak jiska senk pouz lapli nan zòn izole, ki elve yo*

*Gwo nèj imid ak rafal van kapab afekte vwayaj lendi yo epi lakòz blakawout, espesyalman nan reyon North Country, Mohawk Valley, Distri Kapital la ak reyon Mid-Hudson yo*

*Nou ankourage Nouyòkè yo pran anpil prekosyon lè y ap vwayaje nan zòn ki afekte yo, sitou pandan lè trajè lendi maten an*

*Yo prevwa nèj akoz efè lak yo olaj Lak Erie ak Lak Ontario*

*Enskri pou NY-Alert pou resevwa dènye alèt metewolojik yo*

Gouvènè Kathy Hochul jodi a te ankourage Nouyòkè yo atravè eta a pou prepare yo pou yon gwo sistèm metewolojik ke yo prevwa ki pral pote lapli, rafal ral, ak nèj nan majorite zòn yo. Apati dimanch byen ta, lapli modere ak gwo lapli pral afekte pifò eta a ak total lapli ki soti nan 1-3 pouz yo prevwa pou pifò zòn yo ak potansyèl pou jiska senk pouz nan zòn izole ki elve yo. Lapli pral finalman tranzisyone pou pase nan gwo nèj imid pandan evènman an ak pi gwo kantite nèj yo prevwa nan reyon North Country, Mohawk Valley, Distri Kapital la, ak reyon Mid-Hudson yo. Konbinezon gwo nèj imid ak gwo van ka mennen nan vwayaj danjere ak blakawout nan kèk zòn. Rafal van nan tout eta a prevwa pi fò nan sid eta a, sitou sou rivaj sid Long Island ak raf ki rive jiska 80 kilomèt alè, byenke izole, rafal pi fò posib nan kèk kote. Nouyòkè yo ta dwe pran anpil prekosyon anplis lè y ap vwayaje nan zòn ki afekte yo, sitou pandan lè trajè yo nan lendi.

"Wikenn sa a n ap gade yon gwo sistèm metewolojik k ap pote lapli, nèj ak rafal van ki kapab lakòz kèk pwoblèm danjere pou Nouyòkè yo, tankou inondasyon, vwayaj danjere, ak blakawout", **Gouvènè Hochul te deklare.** "Mwen deja mande ajans eta yo pou kontwole sistèm metewolojik sa a pandan tout tan li epi pou yo pare pou reponn ak nenpòt demann pou asistans. Mwen ankourage tout Nouyòkè yo pou yo prepare kounye a epi planifye pou de jou k ap vini yo pandan previzyon an vin pi klè."

Yo prevwa nèj efè lak tou lendi sou direksyon van nan Lak Erie ak Lak Ontario nan New York Santral, Iwès ak sid Adirondacks, ak Catskills. Bòn Lak Erie, yo prevwa to chit nèj maksimòm jiska de pouz nèj pa èdtan ak jiska yon pye nèj pou zòn sid Buffalo. Pou zòn ki toupre Lak Ontario, yo prevwa to chit nèj maksimòm jiska twa pouz pa èdtan, petèt li ka afekte Syracuse ozalantou trajè lendi aswè a. Nouyòkè yo ta dwe siveye move tan pou zòn yo pandan wikenn nan pandan ke previzyon yo ap kontinye devlope pandan jou k ap vini yo.

Pou kapab jwenn yon lis konplè sou alèt ak previzyon meteyo yo, vizite sit entènèt Sèvis Meteyowolojik Nasional (National Weather Service) la nan <https://alerts.weather.gov>. Nou ankouraje Nouyòkè yo pou enskri pou alèt ijans lè yo abone nan Alèt NY nan <https://alert.ny.gov>, yon sèvis gratis ki bay enfòmasyon ijans gratis sou telefòn ak òdinatè ou.

### **Preparasyon Ajans**

#### **Divizyon Sekirite Teritwa ak Sèvis pou Ijans yo nan Eta New York**

Divizyon an ap siveye aktivman previzyon metewolojik la epi kowòdone repons Eta a ak evènman move tan an. Anplwaye Biwo Jésyon Ijans (Office of Emergency Management, OEM) yo an kontak ak tokay lokal yo epi yo prepare pou fasilité demann pou asistans.

Divizyon an prepare pou deplwaye resous ak pwovizyon abri sa yo ki soti nan rezèv Eta a, si sa nesesè:

- 1,515 jeneratris
- 536 twonsonez
- 954 aparèy chofaj pòtab
- 48,636 MRE
- 345,432 boutèy ak bidon dlo
- 7,877 kabann
- 8,149 dra
- 11,220 zòrye

### **Depatman Transpò Eta New York la**

Depatman Transpò Eta (Department of Transportation, DOT) a ap prepare pou evènman metewolojik k ap vini an ak plis pase 3,600 sipèvizè ak operatè ki disponib. Ekip yo pral siveye aktivman kondisyon tanpèt yo, bay repons nèj ak glas jan sa nesesè, pandan y ap patwouye sistèm otowout eta a pou danje potansyèl yo pandan tout evènman an.

Kantite ekipman ki genyen nan tout Eta a repati konsa:

- 1,608 gwo kamyon chasnèj
- 335 chajè

- 156 chasnèj mwayen
- 51 remòk chasnèj
- 37 aparèy pou soufle nèj
- 23 kamyon baskil ki gen chari
- 19 aparèy pou fè nivèlman

Pou w jwenn enfòmasyon sou kondisyon vwayaj an tan reyèl, otomobilis yo dwe rele 511 oswa vizite <https://www.511ny.org> oswa sit mobil la nan m.511ny.org, sous enfòmasyon sou kondisyon vwayaj ak sikilasyon ofisyèl Eta New York la.

### **Otorite Thruway**

Otorite Thruway pare pou li entèvni avèk 688 sipèvizè ak operatè ki disponib. Kantite ekipman ak resous ki genyen nan tout eta a repati konsa:

- 349 kamyon chasnèj pwa lou ak pwa mwayen
- 11 remòk chasnèj
- 67 gwo chajè
- Plis pase 127,000 tòn sèl disponib

Yo itilize Pano pou Mesaj Varyab ak rezo sosyal yo pou avèti otomobilis yo sou kondisyon move tan ivè pandan yo sou Thruway la.

Otorite Thruway yo ankouraje otomobilis yo telechaje [aplikasyon mobil](#) li an, ki disponib gratis sou aparèy iPhone ak Android yo. Aplikasyon an bay otomobilis yo aksè dirèk ak enfòmasyon sou sikilasyon an nan tan reyèl, kamera sikilasyon yo nan tan reyèl, ansanm avèk asistans pou navigasyon pandan yo sou wout. Otomobilis yo ka enskri tou pou imèl [TRANSalert](#) episwiv [@ThruwayTraffic](#) sou X poudènye enfòmasyon sou kondisyon sikilasyon sou Thruway la.

### **Depatman Sèvis Piblik nan Eta New York**

Konpayi sèvis piblik yo ki reglemante pa Depatman Sèvis Piblik (Department of Public Service, DPS) la gen apeprè 5,500 travayè ki disponib nan tout eta a pou angaje yo nan efò reparasyon ak restorasyon pou sistèm move tan ivènal la. Pèsonèl DPS la pral swiv travay sèvis piblik yo pandan tout evènman an epi asire konpayi sèvis piblik yo voye anplwaye apwopriye yo nan rejon ki gen pi gwo enpak yo. Si yo entèwont sèvis ou a, vizit [sit entènèt](#) Entèripsyon Sèvis Piblik DPS la pou jwenn konsèy.

### **Lapolis Eta New York**

Lapolis Eta a ap siveye kondisyon metewolojik yo epi prepare pou deplwaye manm Patwouy anplis, jan sa nesesè. Tout machin katpakan ak veyikil espesyalize Lapolis Eta a yo, ki gen ladan motonèj ak veyikil itilitè tout tèren yo, anplas ak prè pou entèvansyon imedyat, epi yo te teste tout ekipman pou kouran ak komunikasyon ijans yo.

### **Depatman Konsèvasyon Anviwònmantal Eta New York la**

Anplwaye Jesyon Ijans DEC, Ofisyen Lapolis Depatman Konsèvasyon Anviwònmantal, Jandam Forè yo ak anplwaye rejjonal yo an alèt epi yo ap siveye sitiayson ki ap devlope a. Tout resous disponib yo prè pou ede ak nenpòt entèvansyon ijans.

### **Biwo Pak, Lwazi ak Prezèvasyon Istorik (Office of Parks, Recreation and Historic Preservation, OPRHP) nan Eta New York**

Lapolis Pak Eta New York ak anplwaye pak yo rete alète epi y ap swiv deprè kondisyon metewolojik ak enpak yo. Yo ap alimante, teste epi prepare ekipman pou repons, pou fè entèvansyon nan ka tanpèt. Vizitè pak yo dwe tcheke <https://parks.ny.gov> parks.ny.gov oswa rele biwo pak lokal yo pou yo jwenn dènye nouvèl konsènan lè fonksyònman pak yo, lè ouvèti ak fèmti yo.

### **Otorite Transpò Metropoliten**

Otorite Transpò Metropoliten (Metropolitan Transportation Authority, MTA) an ap siveye kondisyon meteyowolojik yo deprè pou asire sèvis san danje ak fyab. Anplwaye MTA yo ap pare pou entèvni kont tout pwoblèm ki lye ak kondisyon meteyo yo, enkli epi retire tout pye bwa ki ta ka tonbe sou wout yo.

Akòz kondisyon gwo van yo prevwa, Otorite Pon ak Tinèl MTA a ap mete yon entèdiksyon pasiv an plas kont traktè remòk vid yo ak kamyon tandèm yo (piggyback, doub, trip, elatriye) apati 6:00 p.m. Dimanch aswè. Dapre previzyon aktyèl la ak dire jeneral evènman move tan sa a, yo prevwa ke entèdiksyon pasiv sa a pral an plas jiska 6:00 a.m. nan lendi maten.

Anplis entèdiksyon pasiv la, pasaj pyeton yo sou pon Cross Bay Veterans Memorial ak poon Marine Parkway yo pral fèmen pandan peryòd sa a. Pasaj pyeton yo sou Pont Robert F. Kennedy ak Henry Hudson yo ap rete ouvri men yo pral fèmen lè/si kondisyon yo mande.

Nou ankouraje kliyan yo tcheke <https://new.mta.info> pou dènye mizajou sou sèvis, epi pou yo pran prekosyon pandan y ap navige sistèm lan. Kliyan yo tou ta dwe enskri pou sèvis alèt an tan reyèl yo atravè mesaj tèks oswa imèl. Alèt sa yo disponib tou atravè aplikasyon MTA yo: MYmta ak TrainTime.

### **Otorite Pòtyè**

Otorite Pòtyè a ap siveye kondisyon meteyowolojik yo nan tout etablisman li yo. Nan ka ta gen kondisyon metewolojik grav, ajans lan ap bay alèt vwayaj regilye ak mizajou jan sa nesesè. Pou dènye enfòmasyon yo sou etablisman Otorite Pòtyè yo, tanpri tcheke rezo sosyal yo, enskri pou [alèt PA](#) yo oswa telechaje youn nan aplikasyon mobil PA yo, ki enkli [RidePATH](#) ki bay mizajou nan tan reyèl ak alèt pou sèvis PATH.

### **Konsèy sekirite**

#### **Vwayaj**

Men kèk nan konsèy ki pi enpòtan pou woule ansekirite:

- Pa kondui, sof si sa nesesè.

- Si ou dwe vwayaje, asire ou ke otomobil ou gen materyèl pou siviv tankou lenn, yon pèl, flash ak pil anplis, rad cho anplis, yon pè chèn pou kawotchou, kab boustè pou batri, manje ki bay enèji rapid ak rad ki gen koulè klere pou sèvi kòm drapo detrès.
- Si ou gen telefòn selilè oswa lòt aparèy komunikasyon tankou yon wòki tòki disponib pou ou sèvi, kenbe batri a chaje epi kenbe I avè ou tout lè ou ap vwayaje. Si ou ta vin bloke, ou ap kapab rele pou mande èd, enfòme sekouris yo sou kote ou ye.
- Prensipal kòz lanmò ak blesi pandan tanpèt ivè se aksidan transpò. Anvan ou chita dèyè volan, pa blyie retire glas ak nèj ki sou machin ou an; bon vizyon se sekrè kondui byen. Planifye arè ou yo epi kite plis distans ant machin yo. Pote plis atansyon epi sonje pil nèj yo ka maske timoun ki pi piti yo. Toujou koresponn vitès ou selon kondisyon wout la epi selon meteyowolojik.
- Li enpòtan pou chofè ki sou tout wout yo konnen vitès chasnèj yo se 56 kilomèt alè, sa ki nan anpil ka pi ba pase limit vitès ki make a, pou yo ka garanti sèl yo simen an rete nan vwa sikilasyon yo epi pa dispèse andeyò wout yo. Anpil fwa sou otowout ant eta yo, chasnèj yo opere kòtakòt, kòm se fason ki pi efikas epi ki ofri plis garanti pou netwaye plizyè vwa yon sèl kou.
- Chofè machin ak pyeton dwe sonje chofè chasnèj yo ka wè devan yo sou yon distans limite, epi gwosè ak pwa chasnèj yo ka fè l difisil pou manevre epi frennen touswit. Nèj chasnèj la ap soufle dèyè li ka diminye vizibilite anpil oubyen kreye yon vwal blan. Chofè machin yo pa ta dwe eseye double chasnèj yo, ni swiv yo twò pre. Kote ki gen plis sekirite pou chofè machin yo woule se lwen dèyè chasnèj yo, kote wout la klè epi gen sèl sou li. Pa janm eseye pase sou yon chasnèj pandan l ap fonksyone.

## **Blakawout yo**

- Tcheke konpayi sèvis publik ou a pou ou ka konnen orè reparasyon nan zòn nan.
- Etènn oswa deploge limyè ak aparèy menaje pou ou ka evite yon sichaj kouran lè yo repare sèvis la: kite yon limyè limen pou endike lè yo te retabli kouran.
- Si chalè a ale pandan yon tanpèt ivènal, kenbe kay la cho lè w fèmen chamm ou pa bezwen yo.
- Pou rapòte yon blakawout, rele:
  - Central Hudson: 800-527-2714
  - Con Edison: 800-752-6633
  - National Grid: 800-867-5222
  - NYSEG: 800-572-1131
  - O&R: 877-434-4100
  - PSEG-LI: 800-490-0075
  - RG&E: 800-743-1701

## **Sekirite pou Chofaj**

- Sèvi ak sous chalè altènatif ki an sekirite sèlman tankou yon chemine, ti recho a bwa oswa a chabon ki byen ayere oswa aparèy chofaj pòtab.
- Lè w ap itilize sous chalè altènatif tankou yon chemine, recho a bwa, elatriye, toujou asire w ke ou gen bon vantilasyon. Toujou Swiv enstwiksyon fabrikan yo.
- Kenbe rido, sèvyèt ak manchon pwoteksyon yo lwen sifas cho.
- Gen yon ekstenktè ak detektè lafimen epi asire w yo fonksyone.
- Si w itilize aparèy chofaj ki mache ak kewozèn pou konplete gaz chofaj regilye w la, oswa kòm yon sous chalè ijans, swiv konsèy sekirite sa yo:
  - Swiv enstwiksyon fabrikan yo.
  - Sèvi ak gaz ki kòrèk la sèlman pou inite w la.
  - Remete konbistib deyò sèlman epi lè inite a frèt sèlman.
  - Kenbe aparèy chofaj nan yon distans omwen twa pye ak mèb yo lòt eleman konbistib yo.
  - Lè w ap itilize aparèy chofaj la, sèvi ak pwoteksyon kont dife epi vantile byen.

Pou plis konsèy sekirite sou lvè a, vizite <https://dhses.ny.gov/safety>. Pou tout bezwen sèvis ki pa ijans anvan, pandan oswa apre yon tanpèt nan Eta New York, rele 211 oswa vizite 211nys.org.

## **Enfòmasyon sou Divizyon Sekirite Teritwa ak Sèvis pou Ijans**

Divizyon Sekirite Enteryè ak Sèvis pou Ijans yo (Division of Homeland Security and Emergency Services, DHSES) ofri direksyon, kowòdonasyon ak soutyen pou anpeche, pwoteje kont, prepare pou, reponn a, rekipere apre, epi diminye katastwòf ak lòt ijans. Pou plis enfòmasyon, swiv @NYSDHSES sou Facebook, Instagram, ak X (Anvan li te rele Twitter) oswa vizite dhses.ny.gov.

###

Lòt nouvèl disponib sou sit [www.governor.ny.gov](http://www.governor.ny.gov)

Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418  
Enskri pou w jwenn mizajou Biwo Gouvènè a: [ny.gov/signup](http://ny.gov/signup) | Voye tèks NEW YORK bay 81336

[ANILE ENSKRIPSYON OU](#)